

Jangan biar budaya rasuah rosakkan masa depan negara

Pekerjaan ialah suatu amanah yang perlu dipikul dengan penuh kecekalan dan integriti. Negara kita baru-baru ini dikejutkan dengan pelbagai isu membabitkan integriti daripada pegawai kanan hinggalah kakitangan berpangkat rendah.

Bermula isu yang dibangkitkan membabitkan dakwaan kepada perlindungan pusat perjudian hingga menyebabkan beberapa pegawai kerajaan ditahan untuk siasatan. Namun, isu ini belum pun reda, muncul pula isu penerokaan tanah haram di beberapa kawasan yang sehingga kini menimbulkan persoalan, bagaimana ratusan ekar tanah boleh diterokai

tanpa disedari pihak berkuasa.

Belum selesai isu itu, timbul pula isu membabitkan penjawat awam yang diamanahkan untuk menjaga pintu masuk negara. Ini tidak termasuk lagi isu integriti yang berada di ruang legar kecil kehidupan rakyat. Rakyat pasti ternanti-nanti, apakah episod sebegini akan berterusan di negara ini.

Semua kes yang berada dalam siasatan ini sebenarnya menjadi ancaman serius kepada kedaulatan undang-undang dan negara sekiranya ia dibiarkan berliku dan berleluasa.

Ketika sebahagian rakyat mematuhi undang-undang dengan tekun, kais pagi makan pagi untuk mencari rezeki dan berusaha melunaskan cukai diwajibkan untuk menanggung perbelanjaan negara, terdapat mereka yang diberi tanggungjawab mengkhianati amanah terbabit demi mencapai kesenangan dan kenikmatan segera.

Tidak kira jenis dan bidang peker-

jaan sekalipun, budaya rasuah boleh menggadaikan masa depan negara. Islam sendiri melarang keras umatnya daripada terbabit dalam gejala rasuah.

Larangan itu dinyatakan dengan sangat tegas dan keras oleh Rasulullah SAW: "Laknat Allah kepada pemberi rasuah dan penerima rasuah." (Hadis riwayat Imam Ahmad)

Begitu juga dalam suatu hadis lain: Rasulullah SAW melaknat pemberi dan penerima rasuah. (HR Ahmad)

Larangan dengan lafaz laknat itu bertepatan dengan penegasan terhadap kedudukan pendapatan daripada sumber haram yang tiada tempat untuk seseorang manusia melainkan di neraka.

Rasulullah SAW bersabda: "Setiap daging yang tumbuh daripada perkara yang haram, maka neraka adalah lebih layak baginya."

Rasuah dalam sektor awam dan

swasta seperti dirakamkan dalam laman web SPRM, akan menyumbang kepada kepincangan sesebuah kerajaan hingga tidak dapat menyediakan kemudahan kepada negara, sekali gus menjadi halangan kepada keselamatan dan persekitaran membangun, dinamik perniagaan serta menyebabkan masyarakat itu sendiri merosot.

Berdasarkan statistik direkodkan SPRM, hampir setiap bulan terdapat ratusan tangkapan yang dibuat membabitkan penjawat awam dan swasta.

Berdasarkan kes yang sedang disiasat sekarang, cuba bayangkan seandainya terdapat penguat kuasa sendiri yang melindungi premis yang tidak sepatutnya, bagaimana pula masyarakat yang membayar cukai meminta untuk mereka dilindungi sedangkan hak mereka dicabuli?

Demikian juga dengan keadaan rakyat begitu sukar untuk mendapat sebidang tanah untuk membina

rumah, sedangkan terdapat ratusan hektar tanah yang diterokai tanpa melalui saluran yang betul.

Demikian juga isu lambakan mereka yang tidak pandai berbahasa Melayu dan tidak mempunyai roh sebagai rakyat Malaysia, namun mempunyai kad pengenalan biru berstatus warganegara.

Amalan rasuah akan menatijahkan kesan dan kesudahan yang sangat buruk sama ada untuk persekitaran semasa mahupun masa depan sesebuah negara.

Hakikatnya, rasuah boleh menghancurkan keadilan dalam sesebuah negara hingga menyebabkan manusia lemah dizalimi.

Dalam konteks masyarakat, rasuah yang berleluasa akan melahirkan masyarakat yang tiada kemahiran dan muncul kelompok yang pentingkan diri sendiri.

Ia menatijahkan hasil kerja yang buruk tetapi kos pengurusan meningkat, pengurusan pentadbiran menjadi lambat dan keucar-kacir, muncul orang jahat yang bertambah jahat serta menyebabkan pembahagian kekayaan yang tidak seimbang.

Penulis tertarik dengan perumpamaan sering digambarkan buat penerima dan pemberi rasuah. Rasuah umpama anai-anai yang boleh meruntuhkan sebuah rumah, kerjanya tidak nyata tetapi mampu melumpuhkan sebuah negara.

Justeru, kita perlu kita sama-sama mengelak diri daripada terbabit sebarang salah laku rasuah, malah berganding bahu dengan pihak berwajib bagi membasmi gejala rasuah yang akan dilaknat Allah SWT.

Penulis adalah Pensyarah Kanan Jabatan Fiqh dan Usul, Akademi Pengajian Islam, Universiti Malaya



Dr Syed Mohd Jeffri Syed Jaafar

